

**Ataatsimiinnerup ammarneqarnera**  
(Inatsisartut Siulittaasuata tullia siulleq)

Inatsisartut 2014-mi upernaakkut ataatsimiinnerat maanna ammarneqarpoq.

Nuannaarutigeqara Inatsisartunut ilaasortaqaikka upernaakkut ataatsimiinnermut matumunnga ullumi maanga ataatsimiittarfitsinnut tikilluaqqusinnaagakkit. Ataatsimiinnermi oqaluuserisassat pingaarutillit oqaluuserisussaavagut, neriutigaaralu suleqatigiilluarnitsigut angusaqarfiulluurtumik oqaluuseriumaarivut.

Aallaqqaasiutigalugu ilisimatitsissutigissavara Inatsisartut Siulittaasuata tulliatut siullertut upernaakkut ataatsimiinneq manna ammarakku, siulittaasorput Lars Emil Johansen Timersoqatigiit Kattuffiannut illersuisutut Alaskamiimmat Issittormiut Ukiuunerani Unammiaaqaatigiinneri Arctic Winter Games malinnaavigiartorlugit. Unammiaarnerni ingerlasuni timersortartortatta angusaqarluarnissaannik misigisaqarluarnissaannil ajunnginnerpaanik kissaateqaatigaluni – tamatta isumaqatigigunakkatsinnik – inuulluaqqussutaa ilissinnut apuukkusuppara.

Naalackersuisut inatsisiliortullu suleqatigiilluarnissaannik kissaateqarlunga taamatuttaaq Naalackersuisunut ilaasortat qamannga pisumik tikilluaqqakka.

Taamatuttaaq nuannaarutigaara Inatsisartut Ombudsmandiat kiisalu Naalagaaffiup Sinniisaa tikilluaqqusinnaagakkit.

Taamatullu aamma tusagassiortut ataatsimiinnermik malinnaasut tikilluaqqakka.

Sineriatsinni isorartoqisumi nunaqqativut tamaasa radiukkut, isiginnaarutikkut inatsisartullu nittartagaatigut Inatsisartut ataatsimiinnerannik malinnaasinnaasut pinngitsoorusunngilanga aamma tikilluaqqussallugit.

Inatsisartunut ilaasortanut najuuttunut taamatuttaaq immikkut inuulluaqqussutissaqarpunga, tassalu Norgemi Saamit inatsisartuisa siulittaasuannit, februaarimi siulittaasorput Lars-Emil Johansen ilagalugu tikeraakkatsinnit.

Ilisimatitsissutigissavara Inatsisartunut Naalackersuisunullu ilaasortat tamarluinnangajammik ataatsimiinnerup ammarneqarnerani najuummata.

Inatsisartunut ilaasortaq Jens B. Frederiksen 12. marts 2014 Inatsisartunit tunuarpoq, taamaattumillu Siulittaasoqarfiup Michael Rosingip Inatsisartunut ilaasortatut nutaatut ataatsimiigiaqquneqarnissaa akuerisimallugu.

Jens B. Frederiksen Inatsisartunut november 2005-imi qinigaavoq. Jens B. Frederiksen atuuffigilikkamini ingerlalluarnissaanik kissaapparput ukiunilu qaangiuttuni suleqatigisimaneranut qujaffigalugu.

Qinigaanerup Misilinneqarnissaanut Ataatsimiititaliap Michael Rosingip qinigaasinnaanera akuersissutigisimavaa.

Tamanna tunngavigalugu matumuuna Michael Rosingip Inatsisartunut ilaasortatut ivertinneqarnissaata akuerineqarnissaa Inatsisartunut inassutigaa.

Akerliusoqarnerluni.....

Michael Rosing tikilluarit, Inatsisartuni inissannut ingissinnaavutit.

Naggasiutigalugu ilisimatitsissutigissavara februaarip qaammataata naalernerani Siulittaasoqarfik isumasioqatigiimmat Inatsisartut Suleriaasiat malittarisassallu allat Inatsisartut sulineranni najoqqutarineqartut misissuataarlugit. Siulittaasoqarfiup naatsorsuutigaa inatsisartuni sulinermut killiliussat pitsanngorsarneqarnissaannut siunnersuutininik assigiinngitsunik ukiamut saqqummiussisinaanissani.

Taamatut oqaaseqarlunga najuuttut tikilluaqqoqqippakka. Neriuppunga ataatsimiinnivut pitsaasumik inerititaqarfiusumillu ingerlakkumaarivut, ataatsimiinnermilu anguniakkavut angujumaarivut.